



**Universität
Zürich^{UZH}**

INSTITUT
KULTURFORSCHUNG
GRAUBÜNDEN

INSTITUT
PERSCRUTAZIUN DA LA CULTURA
GRISCHUNA

ISTITUTO
RICERCA SULLA CULTURA
GRIGIONE

3 plazzas da doctorat a 100 %

Il Seminari da romanistica da l'Universitad da Turitg e l'Institut per la perscrutaziun da la cultura grischuna a Cuira occupan tenor cunvegna, dentant il pli tard a partir dal 1. da favrer 2021, trais plazzas da doctorat per la durada da quatter onns en la domena da la litteratura tudestga / rumantscha / taliana / cumparativa. Las trais plazzas da doctorat fan part dal project da retschertga «In spazi vivì – trais litteraturas. Lecturas da las midadas en Grischun suenter il 1945» finanzià dal Fondo naziunal svizzer e dirigì da Prof. Dr. Rico Valär (UZH) e da Dr. Cordula Seger (icg). Il focus tematic da las trais lavurs da doctorat correspunda als trais sutprojects detagliads sutvart.

Il Seminari da romanistica è in da ventg instituts e seminaris da la Facultad filosofica da l'Universitad da Turitg. Qua vegnan perscrutadas ed instruidas las linguas e litteraturas da las linguas romanicas en tut lur varietad. Cun las professuras per litteratura franzosa, taliana, rumantscha e cumparativa è represchentadas trais litteraturas svizras e duas litteraturas grischunas e documentadas cumplessivamain en la biblioteca.

L'Institut per la perscrutaziun da la cultura grischuna (icg) domicilià a Cuira è ina instituziun scientifica independenta che vegn finanziada da la Confederaziun e dal Chantun Grischun. L'institut promova ed effectuescha retschertgas en las domenas da las scienzas umanisticas, socialas e culturalas cun atenziun particulara al spazi alpin dal Grischun e sias regiuns limitrofas.

Descripziun dal project

Il project scientific «In spazi vivì – trais litteraturas. Lecturas da las midadas en Grischun suenter il 1945» perscrutescha co che las midadas culturalas suenter il 1945, che han marcà profundamain il spazi alpin pluriling dal Grischun sco experientscha collectiva, vegnan formuladas, discutadas ed elavuradas en las litteraturas grischunas da lingua tudestga, taliana e rumantscha. A maun d'in corpus pluriling da texts, che na resguarda betg mo cudeschs mabain er texts publitgads en chalenders, annalas u revistas, vegnan analisadas las dumondas centralas en in project da rom ed en trais sutprojects. Il project da rom, che vegn realisà dals dus responsabels dal project, sa fatschenta cun las cundiziuns e realitads da la scena litterara grischuna suenter il 1945 ed analysescha las structures, pussaivladads da publitgar, las finamiras da la politica linguistica e las concepziuns moralas che han marcà la produziun e recepciun litterara.

Sutproject «Construcziuns biograficas e plurilinguitad»

Per l'ina vai per las biografias intellectualas dad auturas ed auturs selecziunads e per lur strategias en connex cun experientschas da plurilinguitad, cun la situaziun da litteraturas pitschnas e cun las limitaziuns e pussaivladads che caracteriseschan las realitads grischunas. Per l'autra vai per la dumonda co che la plurilinguitad marca raquints biografics e s'inscriva al nivel textual.

Sutproject «Gender – famiglia – generaziuns»

Quest project sa fatschenta cun las configuraziuns da masculinitad e femininitad en il spazi rural e cun las concepziuns da generaziun e famiglia. Colliadas cun questas tematicas èn dumondas pertutgant las consequenzas da las midadas socialas per las concepziuns da gender, famiglia e generaziun. Co vegnan represchentadas e per part er anticipadas en la litteratura las tradiziuns, las rupturas e las conflictualitads respectivass?

Sutproject «Appartegnientschas – l'ester en l'agen»

Quest project s'interessa per l'interacziun tranter literarisaziun e turistificaziun dal Grischun e per las tensiuns tranter agen ed ester che resultan da quella. En quest connex vegnan resguardads divers puncts da vista: Per l'ina la perspectiva dad auturas ed auturs che tschernan il Grischun sco lieu per in segiurn temporar, sco lieu che cuntrastescha cun lur conturns usitads ed enconuschents. Per l'autra quella dad auturas ed auturs indigens che percepeschan il Grischun sco spazi quotidian collià cun las concepziuns da generaziun e famiglia.

Infurmaziuns detagliadas davart ils sutprojects chattan ins en il [document collià](#).

Vossas incumbensas

- Elavurar en moda autonoma ed autoresponsabla in dals trais sutprojects scientifics descrits.
- Collavurar al stabiliment d'in corpus da texts specific e pluriling, sviluppar chavazzins per ils texts ed effectuar l'analisa textuala tenor las dumondas scientificas formuladas.
- Publitgar artitgels en revistas impurtantas che funcziunan tenor il proceder da peer-review e tegnair referats en il rom d'occurrentzas e dietas impurtantas dad instituziuns da perscrutaziun e furmaziun svizras ed estras.
- Participar a las sedutas regularas da la gruppa da project, a las sedutas da stgomi cun las expertas ed ils experts ed a las occurrentzas da las duas instituziuns purtadras.
- Sustegnair las instituziuns purtadras tar l'organisaziun dad occurrentzas e conferenzas.

Voss profil

- Licenciatur u master en ciencias litteraras cun focus specific sin litteratura tudestga, taliana, rumantscha u cumparativa.
- Studi en il rom lateral cun preferentscha en litteratura, ciencias culturalas, istorgia u etnologia.
- Cumpetenzas linguisticas e litteraras solidas en almain duas da las trais linguas dal project (tudestg, talian, rumantsch) ed experientscha cun metodos interdisciplinaras e cumparativas.
- Enconuschientschas da las realitads linguisticas e culturalas dal Grischun e/u da l'istorgia dal suenterguerra.

Nus purschain

- La pussaivladad da sa deditgar ad ina lavur da doctorat e da survegnir in feedback regular dad expertas ed experts qualifitgads,
- in context interdisciplinar e pluriling,
- ina collavuraziun stretga cun la gruppa da project e la pussaivladad da far contacts entaifer l'universitad,
- ina lavur en in context relevant per la societad,
- cundiziuns da lavur atractivas (tenor las directivas al FNS) cun la pussaivladad da lavurar en las regiuns da Cuira e/u da Turitg.

Lieus da lavur

Universitad da Turitg center e/u Institut per la perscrutaziun da la cultura grischuna, Cuira

Entschatta da la lavur

Il contract da lavur entschaiva tenor cunvegna, dentant il pli tard il 1. da favrer 2021.

Ans tramettai per plaschair Vossa candidatura en in unic document PDF fin il pli tard ils 4 da december 2020 a las adressas rico.valaer@rom.uzh.ch e cordula.seger@kulturforschung.ch.

Vossa candidatura stuess cuntgnair ils documents suandants:

- in curriculum vitae detaglià che cuntgna tuttas prestaziuns academicas ed ina glista da publicaziuns,
- ina charta da candidatura e motivaziun en la quala Vus motivais Voss interess per quest project da retschertga ed en il qual Vus declerais explicitamain per tge sutproject che Vus As interessais e per tge motivs,
- copias u scans da Voss diploms academicas,
- ina prova da lavur (p.ex. ina publicaziun ubain max. 20 paginas da la lavur da master).

Ulteriuras infurmaziuns

Prof. Dr. Rico Valär, rico.valaer@rom.uzh.ch

Dr. Cordula Seger, cordula.seger@kulturforschung.ch